

# Akta pendidikan dipinda

BH - 4/7/2007.

## Draf naik taraf maktab perguruan kepada IPG dibentangkan tahun ini

Oleh Abdul Halim Yusof  
dan Jalal Ali Abdul Rahim

**K**UALA LUMPUR: Akta Pendidikan 1996 akan dipinda bagi memasukkan peruntukan untuk menaik taraf maktab perguruan menjadi Institusi Pendidikan Guru (IPG) yang lulusannya akan menerima ijazah.

Kementerian Pelajaran sedang memperhalusi draf akta itu dan dijangka dibentangkan di Parlimen dalam tahun ini juga.

Cadangan itu dinyatakan dalam Kad Laporan Pelan Tindakan Pembangunan Pendidikan (PTPP) yang dibentangkan Menteri Pelajaran, Datuk Seri Hishammuddin Hussein di Parlimen, semalam.

Bagi melaksanakan cadangan itu, kementerian sedang memantapkan latihan perguruan untuk diselaraskan dengan langkah menaik taraf maktab perguruan kepada IPG.

Usaha menaik taraf maktab perguruan itu terkandung dalam pelaksanaan teras kelima PIPP; memartabatkan profesion keguruan. Program lain ialah menambah baik sistem pemilihan calon guru, perjawatan, penempatan dan kebajikan guru.

PTPP turut menetapkan Standard Guru Malaysia (SGM) yang kini dalam peringkat akhir perancangan ba-

gi dijadikan rujukan berhubung piala kualiti guru di seluruh negara dengan dimulakan di sekolah sekitar Lembah Klang bulan depan.

SGM adalah sistem amaran awal supaya guru sendiri peka terhadap keperluan untuk melaksanakan usaha pengukuhan, peningkatan dan pemantapan ilmu, kemahiran serta personaliti.

Standard ini merangkumi dua komponen khusus iaitu komponen standard membabitkan elemen nilai dan amalan profesional keguruan, pengetahuan dan kefahaman berkaitan bidang keguruan serta kemahiran pengajaran dan pembelajaran.

Komponen kedua ialah berhubung keperluan latihan meliputi kelayakan memasuki program dan latihan, penaksiran dan penilaian, kolaborasi, infrastruktur dan infostruktur.

Inisiatif SGM adalah sejajar saranan Perdana Menteri, Datuk Seri Abdullah Ahmad Badawi supaya guru sentiasa menokok nilai diri dengan terus belajar dan menambah ilmu untuk menjadi guru yang kekal relevan dengan tuntutan zaman.

Lima lagi teras PTPP ialah membina negara bangsa, membangunkan modal insan, memperkasa sekolah kebangsaan, merapatkan jurang pendidikan dan melonjakkan kecemerlangan institusi pendidikan.